

# Lescha da taglia dalla pleiv catolic-romana da Falera

Sebasond sin la lescha da taglia dalla vischnaunca e sin la lescha davart las taglias da baselgia dil cantun Grischun

## I. Disposiziuns generalas

### Art. 1 Object dalla taglia

La pleiv catolic-romana da Falera incassescha las suandontas taglias tenor las disposiziuns dil dretg cantunal:

- a) ina taglia sin las entradas e sin la facultad;
- b) ina taglia supplementara ed ina taglia penala.

### Art. 2 Dretg subsidiar

Aschinavon che questa lescha cuntegn neginas regulaziuns, vegnan applicadas conform al senn las disposiziuns dalla lescha davart las taglias communalas e davart las taglias da baselgia sco era da la lescha da taglia dalla vischnaunca da Falera e da la lescha cantunala da taglia.

## II. Dretg material

### Art. 3 Pei da taglia

Las taglias sin las entradas e sin la facultad vegnan incassadas en pertschients dalla taglia cantunala sempli.

La radunonza dalla pleiv da Falera fixescha il pli tard il december il pei da taglia per igl onn fiscal suandont.

### Art. 4 Subject da taglia

Obligadas da pagar taglia ein tuttas persunas ch'appartegnan alla pleiv sco era tuttas persunas catolic-romanas che habiteschan ordeifer il territori dalla pleiv e ch'ei obligadas limitadamein da pagar taglia en la pleiv da Falera tenor il dretg cantunal.

L'obligaziun da pagar taglia sedrezza ton tenor l'appartegnientscha ecclesiastica dallas singulas persunas ch'ei obligadas da pagar taglia alla fin dalla perioda fiscala u alla fin dall'obligaziun da pagar taglia, sco era tenor las disposiziuns dalla lescha cantunala da taglia.

En lètgs, nua ch'ils conjugals appartegnan a differentas confessiuns, ston ils facturs totals vegnir reparti mintgamai per la mesadad sin omisdus conjugals.

### III. Dretg formal

#### Art. 5 Autoritads

Per exequir questa lescha ein cumpetentas – cun resalva dall'alineia 2 – las autoritads ch'ei incumbensadas cun l'execuziun dallas taglias communalas corrispudentas.

Davart l'obligaziun subjectiva da pagar taglia decida la suprastonza dalla pleiv.

#### Art. 6 Scadenza ed incassament

Las taglias da baselgia scadan ensemen cun la taglia communal.

Ellas ston vegnir pagadas ensemen cun las taglias communalas.

### IV. Disposiziuns finalas

#### Art. 7 Entrada en vigur

Questa lescha ei vegnida approvada dalla radunonza dalla pleiv ils ..... *30 da matg 2008* .....  
Ella entra en vigur igl 1. da schaner 2009.

Cun l'entrada en vigur da questa lescha ein abrogadas tuttas disposiziuns d'auters relaschs che stattan en cuntradicziun cun ella.

Per la pleiv catolic-romana da Falera:

Falera, ils ..... *30 da matg 2008* .....

Il president: *[Signature]*

Igl actuar: *[Signature]*

Approbau dalla regenza cun il conclus dils ..... nr. ....

Cuera, ils .....

En num dalla regenza:

Il president:

Il cancelier: